



MANIFIESTU POR UNA NUEVA DEMOCRACIA

(25 de septiembre de 2014)

Nos caberos años tamos viviendo una crisis socioeconómica que n'Asturies sufrimos con gran dureza traducida en paru, precariedá y desigualdá crecientes. Son situaciones que nos xeneren malestar y miéu y que nos torguen ser dafechu conscientes de que tamién esiste una crisis ambiental. Somos rehenes d'una economía globalizada y totalmente dependiente de combustibles fósiles colos que nun cuntamos nel nuesu país. Combustibles qu'amás de ser responsables del cambéu climáticu, empiecen a ralecer y encarecese cada vez más.

A estes crisis súmase otra igual o más grave: una fonda crisis política producida pola percepción de que la corrupción dexó de ser daqué puntual pa convertise en daqué estructural, pola alloñanza de l'alministración colos intereses de la ciudadanía y pol caciquismu, qu'en munches zones d'Asturies vivimos como una mal reinal que naide paez querer o saber remediar.

Esto traduzse en que tamos viviendo un momentu social y políticu que pon en peligru les conquistes de los postreros 40 años. Arriesgámonos a seguir perdiendo derechos, a escosar recursos naturales y, a última hora, a vivir peor.

Por ello les persones que tamos implicaes de manera activa na acción política, tenemos de faer el máximu esfuerzu pa ufiertar respuestes democrátiques y de futuru a la sociedá. Y tenemos de faelo llogrando atrayer a les persones más mocés. A eses xeneraciones de cuya movilización ya implicación política depende que nun sigan empiorando les condiciones llaborales, que nun aumente la inxusticia social y que s'atopen alternativas sostenibles pa nun escosar los nuestos recursos naturales. En definitiva tenemos de llograr la implicación de la mocedá por que tengamos un mundu meyor.

Pa llogralo creemos nuna Cooperativa Política que faiga frente a los partíos anguaño mayoritarios. Pa faer frente a esos partíos empobinaos na más en llograr el poder y exercelo arbitrariamente. Pa faer frente a esos partíos que busquen favorecer a les clases dominantes y poderoses. Pa faer frente a esos partíos cuyos responsables asegúrense cómodos retiros como asesores nes empreses d'esos mesmes clases sociales a les que favorecen. En definitiva, pa faer frente a esos partíos políticos que, pa llograr los sos propios fines nun tienen inconveniente en pasar percima de los derechos de la mayoría. Creemos qu'esos partíos convertíos n'estructures de poder tienen de ser baltiaos y sustituyíos por preseos políticos de participación, horizontales, trespantes, abiertos, equitativos y honestos.

Por ello llamamos a participar nesa Cooperativa na que creemos a cuantes persones y organizaciones compartan la nuesa visión de consiguir unes polítiques locales y autonómica empobinaes a producir el bien común; a quien quiera trabayar mano con mano pa elaborar candidatures que conduzan a gobiernos de transición nos nuestos conceyos y en la nuesa Comunidá Autónoma. Gobiernos dispuestos a camudar la situación pa llograr tres aspectos básicos: rexeneración democrática, democracia participativa y transición escontra un modelu económicu sostenible social, económica y ambientalmente.



Queremos que les persones sían lo primero y pa ello ye imprescindible que:

1. Toles persones participen nesta cooperativa a títulu individual, ensin pactos de cuotes. Y que los partíos que deseyen participar, deleguen tol poder na nueva asamblea conxunta.
2. Que les elecciones primaries sían abiertes tantu pa la presentación de candidatures como pal exerciciu del votu, incorporando la participación y votación telemátiques. Amás, tien de garantizase un procesu d'afechu democráticu dando igualdá d'oportunidaes a toles persones candidates.
3. Les llistes electorales resultantes d'eses elecciones tienen de ser paritaries y alternar el xéneru a partir de la persona más votada (muyer-home o home-muyer, en forma de llistes cremallera)
4. Les persones imputaes en procesos xudiciales de cualesquier tipu nun van poder figurar en nenguna llista.
5. Esta cooperativa nun va pidir créditos pa financiase y les sos cuentas van ser d'afechu transparentes. Amás habrán de ser aprobaes n'asamblea xeneral y tolos datos y actividaes sedrán públicos y de divulgación obligatoria.
6. Les persones que se presenten a la candidatura tendrán d'asumir el compromisu de responder del so trabayu y de qu'esti esté empobináu a la puesta en marcha de toles propuestas electorales realizaes.
7. Va haber renovación constante por aciu de llimitación de mandatos y de tiempu de permanencia en puestos remunerados.
8. El programa electoral va redactase por aciu d'un procesu colaborativu y abiertu. Amás tendrá de contemplar los puntos recoyíos nel Anexu.

Si tu tamién compartes esta visión de la situación y esti camín escontra'l cambéu, el to sofitu a esti manifiestu políticu va ser un pasu más pa evolucionar y ameyorar les coses n'Asturies y los nuegos conceyos. Cuntamos contigo.



Conteníos Mínimos de los Programes Electorales

Pa nós ye imprescindible que los programes electorales de les cooperatives polítiques nesque participemos recueyan, siquieramente, les siguientes cuestiones:

1. Promover una reforma de la Llei Electoral Asturiana que suponga mayor proporcionalidá, una mayor participación y control ciudadanu na política. La base a tomar va ser la propuesta ellaborada na Xunta Xeneral del Principáu d'Asturies n'actual llexislatura.
2. La sociedá tien de recuperar la confianza na so Alministración y pa ello tienen de promovese reformes empobinaes a la so profesionalización, a la eliminación de los mecanismos que favorecen el nepotismu políticu y a implementar métodos de trabayu totalmente trespantes que dexen el control de dicha Alministración a la ciudadanía.
3. Promover una política económica basada nos principios de la Economía del Bien Común y nos empleos “verdes”, estables y de calidá. El crecimentu nun puede considerase un fin en sí mesmu y habrán de tenese en cuenta les consecuencies de la obtención y consumu de combustibles fósiles y materies primes pa la industria. Priorizar les polítiques d'aforru enerxético mediante la sustitución de combustibles fósiles por fontes d'enerxía anovables. Promover la cultura de la ecoloxía industrial, que trabaye pola innovación, pol amenorgamientu de borrales nos procesos de producción y nel amenorgamientu d'insumos enerxéticos y materies primes.
4. Abandonar les polítiques que traten de caltener un sistema basáu nun consumu insostenible d'enerxía y materies primes. Pa ello, van refugase los proyectos de frayadura hidráulica o de minería a cielu abiertu. Proyectos que cola promesa d'unos pocos empleos al curtiu plazu, xeneren problemes que perduren por xeneraciones. Asegurar una transición enerxética que fomente l'aforru y la producción d'enerxía llimpia y anovable garantizando unos mínimos vitales pa toles families.
5. Habrá de promovese una política de relocalización de la economía qu'apueste pol pequenu comerciu local, por empreses d'economía social y pola soberanía alimentaria a través del sofitu a l'agricultura y ganadería ecolóxicos.
6. Trabayar en polítiques que sofiten la educación pública y garanticen una sanidá pública, universal y gratuita.
7. Treslladar al ámbitu políticu les moliciones y propuestas d'un ampliu sector de la ciudadanía que reclama atención sobre los derechos animales. Promover la empatía hacia les demás especies y la protección del mediu ambiente y la biodiversidá al través de la educación. Y prohibir los eventos taurinos y los espectáculos con animales.
8. El caltenimientu de la biodiversidá, la protección del mediu ambiente, la calidá del aire y l'agua y el caltenimientu de los ecosistemas tienen de ser polítiques prioritaries y tresversales a tol programa electoral. Procurar, asina mesmu, la protección y meyora del padremuñu natural d'Asturies y de tolos sos conceyos.
9. Promover una política de borrales basada nun plan d'amenorgamientu de los mesmos y de reciclaxe y que refugue la construcción d'una incineradora na nuesa comunidá.